



拈拾

拈拾是啥貨？簡單講，拈拾就是節約，開錢愛節省，對有路用物件恰資源嘛著愛會曉惜寶。

細漢的時，阮雖罔講是作田人，毋過所收成的粟仔，著愛用來完租。共水租、地租、肥料租納完了後，著愛閣留隔轉年的粟種，恰過年過節拜拜的時愛用來煮飯的米。平常時仔，阮足罕得食白米飯，食的攏是番薯簽乾參淡薄仔白米落去煮的。就算是按呢，食飯的時，若有飯粒仔落仔桌頂，序大攏會叫阮閣拈起來食，閣講著愛拈拾，袂使得討債。彼陣大多數的人攏著愛種作才有通食。因為物質真欠缺，大箍的人真少，若有就會予人笑大箍呆。這陣煞有真濟人食了傷大箍，講啥物 BMI 傷懸，著愛閣開錢去減肥，實在算足袂和盤。這敢會恰『一九九吃到飽』有關係？我捌寫過「食甲飽，定著會食傷飽」，雖罔是大碗閣滿壩，為著家己的健康，上好是莫去食。另外，開錢愛省，食物件嘛愛揀，濟濟的加工食品，會當莫食就減食，才袂去開冤枉錢。

以早資源較欠缺，除了過年時仔抑是較特別的情形，序大人才會恁因仔去買新衫。買的新衫閣會加較大一、兩號，通予因仔到較大漢，猶閣會當穿。無親像這陣真濟人，磕袂著就去哲街買新衫，看著恰意就買。相信這陣家家戶戶的衫仔櫥，攏有真濟舊衫仔褲，毋知欲按怎處理。敢袂使減買寡較省麻煩？

時代變化真緊，咱人類的的生活方式嘛變誠濟。毋過，大多數人日常生活所需要的水、電恰 gá-suh，遮的資源是有限的，用愈濟就會愈來愈少、愈來愈貴。這攏是咱著愛去節省的。其中發電需要用著的石油恰 gá-suh 這兩項，毋是咱臺灣家己有的，攏著愛靠進口，當然是貴參參，嘛會愈來愈貴，哪會使得無寶惜咧？水資源是上天予咱的恩賜，雖罔講咱臺灣是北迴歸線雨水上厚的國家，毋過，因為地形的關係，嘛是不時欠水。人閣愈來愈濟，咱欲按怎珍惜水資源，有需要咱逐家做伙來思考。

總是，地球干焦一个，咱嘛干焦有一个臺灣。拈拾、惜寶是一種美德，嘛是咱逐家攏會當做的。日常生活方面，該儉著儉，該省著省。毋通袂記得，社會上猶有濟濟的人，需要咱同齊伸手來共幫贊。

作者：陳憲國

☆詞彙學習☆

【拈拾】khioh-sip：節儉、惜物。

【啥貨】siánn-huè：甚麼。

【惜寶】sioh-pó：愛惜。

【粟仔】tshik-á：稻穀。

【完租】uân-tsoo：繳納稅捐。

【袂和盤】bē-hô-puânn：不划算、划不來。

【磕袂著】kháp-bē-tiòh：動不動就.....。

【哲街】sèh-ke：逛街。

【gá-suh】gá-suh：瓦斯。

【同齊】tâng-tsê：一同、一起。